

Date – 15/06/2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Republic Veng chuan nimir khan CYMA buatsaih LBS Suzuki 22nd Inter Branch YMA Football 2025 champion an nih chu an vengah an lawm a, sports minister Pu Lalngchinglova Hmar chu khuallian niin a hman pui.
2. Vawiin June ni 15 hi Mizoram Baptist Kohhran Ni pawimawh “Relief Sunday” a ni a. Mizoram Baptist, Tualchhung Kohhran tinah hman a ni ang.
3. Tunhnaia Israel leh Palestine inkar boruak chhiat vangin India chuan Palestine-a India mi awmte chu fimkhur reng tur leh emergency kalphung zawm turin a fuih.
4. Indian Meteorological Department (IMD) chuan ni 2 chhungin Gujarat, Vidarbha, Chhattisgarh leh Odisha hmun thenkhatah Southwest monsoon chuan ziaawm lam a pan dawn niin a sawi.

<><><>

SPORTS MINISTER

Republic Veng chuan nimir khan CYMA buatsaih LBS Suzuki 22nd Inter Branch YMA Football 2025 champion an nih chu an vengah an lawm a, sports minister Pu Lalngchinglova Hmar chu khuallian niin, MP Pu K. Vanlalvena leh minister PC Vanlalruata te an tel bawk.

Minister Pu Lalngchinglova Hmar chuan Football chu eizawna tlak ni mah se mi zawng zawng tan eizawna tur a ni vek lo a, vanneih tel a ngai tih a sawi a, mi tam zawk tan chuan Lehkha zir a pawimawh tih a sawi a, thalaite chu hriselna ngai pawimawh turin a chah bawk a ni.

Mizo thalai dinhmun sawi zuiin Minister chuan, dam rei zawngah tumahin thu an nei lo tih a sawi a, dam rei loh zawng erawh nunphung dik taw lo vanga awm thei a ni tih a sawi a. Zu leh ruihhlo bakah zuk leh hmuam vanga thi an tam tih sawiin, a bik takin mipa thi an tam avangin hmeithai an tam chu paw a tih thu a sawi a. Mizo hnam a ral mai loh a, a awm zel theih nan chuan damrei bakah inthlahpun kawngah harh a ngai bawk, a ti.

MP Pu K. Vanlalvena pawhin thu sawiin, tum ruhna nena tihtakzeta beitu ten a tawpah hlawhtlinna an chang thin tih a sawi a, tunlai khawvelah inelna a san tawh em avangin mahni tum kawnga hlawhtling turin thinlung sakhat leh paukhauh neih a pawimawh tih a sawi bawk.

Thu sawitu dang Minister Pu PC Vanlalruata chuan social media leh tunlai thiamna pung zel vangin khawsak phung a danglam chho mek tih a sawi a,

hetiang a hun inthlak vel hi Mizo ten an paltlang thei a nih chuan YMA a vul zel ang tih a sawi a, thalaite chu chhiatni thatniah tlawmngaihna vawng nung zel turin a chah bakah nu leh pate pawh an fate chu mitthi lumenna lama tir ngam turin a chah bawk a ni.

(Kumin CYMA Football inelnaah team 154 an tel a, team tel a tam bakah veng hlanga khelh a nih avangin inelnain ngaihhlut a hlawh hle. Final-ah Republic Veng hian Bethlehem Vengthlang hnehin a vawi hnih nan an champion a ni.)



RELIEF SUNDAY

Vawiin June ni 15 hi Mizoram Baptist Kohhran Ni pawimawh “Relief Sunday” a ni a. Mizoram Baptist, Tualchhung Kohhran tinah hman a ni ang.

Kumin Relief Sunday thupui chu “Pathian lawmtlak inthawina’ tih a ni. Relief Sunday-ah hian Pathianni zing inkhawmah Headquarters leh Tualchung Kohhran Relief rawngbawlina chanchin report leh thupui thlan sa hmangin thuchah ngaihthlak a ni ang.

Kum 1966-1968 lai vel khan Mizoram hun khirh tak tak mai a tawh chho va, chumi hnuah Kohhran chuan mipui mangangte tanpuina tur thawhlawm (Relief Fund) a bika siam a tha a ti a, chhawmdawlina rawngbawlina hi Kohhrante thinlungah tuh thar zela, uar deuh deuh a lo nih theih nan kum hman a lo ni ta a ni.

Relief & Development Department rawngbawlina lian ber Relief hna hi nasa taka kalpui chhunzawm zel a ni a. Khuarel chhiatna, tui lian, leimin, thli leh rial, kangmei bakah tanpui ngai an awm reng a, heng tuar tute chhawmdawl nan Tualchhung budget atang leh pawn lam tanpuina kan hmuh atangin tanpuina pek thin a ni.

Tun hnai ruahsur leh thli tlehin harsatna Mizoram hmun hrang hrangah a thlen mek a, tun china tanpuina an pek chhuah tawh zawng zawng chu chhungkua 60 hnenah Rs. 3,89,000 a ni. Bialtu Pastor kaltlang leh Staff te’n a hmunah kalin an pe thin a ni. Remchan dan leh an mamawh a zirin Silpouline te pein an sem chhuak thin bawk.

Kum 2025 – 2026 chhunga Relief budget chu Cheng Nuai sawm a ni a. Chhungkaw 60 hnenah cheng Nuai thum singriat sangkua sem chhuah a ni tawh..



PMAY-G

Sorkar laipui hmalakna - Pradhan Mantri Awaas Yojana - Gramin (PMAY-G) hnuaih insak tanpuina dawngtu chu Mizoramah chhungkaw sing 2 sang 6 leh 966 (29,966) an awm tawh.

Thingtlang mirethei in sak tanpuina dawng zinga chhungkaw sing 2 leh 5011 chuan in an sa zo tawh. Lunglei district-a tanpuina dawng te chu sa zo hnem ber niin, an zingah za zela 98.51%-in sa zo tawh a ni.

PMAY-G hnuiaia in sak tanpuina dawng turte hi Socio Economic Caste Census 2011 (SECC) data atanga thlan a ni a, PMAY-G hi sorkar kum 2016-17 atanga hman a nih chauh avangin SECC 2011 survey hun laia beneficiary-te chu in tha nei tawh te, pêm tawh te, thi tawh leh in tha mamawh si list-a chuang ve lo tam tak an awm tih hmuh chhuah a ni. Hei vang hian kum 2018 khan Ministry of Rural Development chuan SECC 2011 survey list-a awm ve lo, in tha mamawh site tan Awaas+Survey a kalpui leh bawk.

Rural Development (RD) department hotute chuan in sak tanpuina atan sorkar laipui atangin sum an hmu tha tih an sawi a, tunah hian State Nodal Account atangin sum hman zawh tawh ni mah se, ministry atangin cheng vaibelchhe 12,9475 dawn tawh a ni a, sorkar Treasury-ah la awm mekin, sum dawn a nih veleh tanpuina sem leh thuai beisei a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

YMA DAY

Mizo tlawmngai pawl lian ber YMA Day chu vawiin hi a ni a, Pathianni a nih avangin YMA Day vawi 90-na hi nimin leh Zirtawpni khan branch tam tak chuan an hmang tawh a, naktuka hman tum pawh an la awm bawk.

Kumin YMA Day June ni 15 hi Pathianni anih avangin Central YMA chuan Branch hrang hrangte June ni 14 emaw Thawhtanni June ni 16 emaw ah YMA Day hmang turin a hriattir a, Branch tam zawk chuan nimin khan hmangin Zing kar atangin branch hrang hrangin mahni veng chhung tifaiin an hnatlang a, Central YMA chuan he ni pual hian Damdawi in leh Home hrang hrangah chibai bukna an lo hlan kual tawh a.

Kumtina tih thin angin Central YMA chuan India ram khawpui hrang hranga Mizo Welfare 17 hnenah YMA Day chibai bukna Rs.15,000/- theuh a pe a, Aizawl khawpui chhunga Sawrkar leh Kohhran Damdawi In 6 ah Rs.15,000/- theuh a hlan bakah Ningani khan Tawngtai Bethel Camping Centre (TBCC), OKM Home leh Thutak Nunpuitu Team (TNT) ah te buhfai bag 50 theuh an hlan bawk.

<><><>

Palestine

Tunhnaia Israel leh Palestina inkar boruak chhiat vangin India chuan Palestina-a India mi awmte chu fimkhur reng tur leh emergency kalphung zawm turin a fuih. Representative Office of India Ramallah chuan nimin khan advisory tichhuakin, India mi zawng zawngte chu fimkhur tur leh tul lova insawn lo turin a chah. Emergency a awm chuan India khua leh tui ten Representative Office an be thei a ni tih a sawi bawk.

<><><>

IMD

Indian Meteorological Department (IMD) chuan ni 2 chhungin Gujarat, Vidarbha, Chhattisgarh leh Odisha hmun thenkhatah Southwest monsoon chuan ziaawm lam a pan dawn niin a sawi. Weather agency chuan a hnu ni 3 chhungin West Bengal, Jharkhand leh Bihar hmun thenkhatah pawh boruak hi a tha dawn niin a sawi a.

India hmarchhak khaw lum lutuk te pawh a zia dawn niin an sawi a, IMD chuan nimin khan khaw lum nasa tak avangin Rajasthan, Punjab leh Haryana-ah te orange alert a tichhuak a ni. Akashvani News nena an inbiaknaah IMD scientist Naresh Kumar chuan tun thlengin heng hmunah hian zan lam boruak pawh a la lum reng dawn tih a sawi. IMD hian ruahsur nasa lutuk avangin ni 2 chhung atan Karnataka, South Interior Karnataka, Kerela, Konkan leh Goa-ah red alert a chhuah bawk.

<><><>